

清史列傳

清史列傳

(全二十冊)

王鍾翰點校

*

中華書局出版

(北京王府井大街36號)

新華書店北京發行所發行

北京順義冠中印刷廠印刷

*

850×1168 毫米 1/32·219¹/₂ 印張·4614 千字
1987 年11月第1版 1987 年11月北京第1次印刷

印數 0001—4000 冊

統一書號：11018·1093 定價：60.60 元

ISBN 7-101-00370-2/K·165

清史列傳卷七十七

循吏傳四

楊榮緒

楊榮緒，廣東番禺人。咸豐三年進士，改翰林院庶吉士，六年，散館，授編修。己未，辛酉兩充順天鄉試同考官。十年，補授河南道監察御史。時戶部尚書肅順導駕幸熱河，意叵測。榮緒與同官抗疏力請迴鑾，又劾參贊國瑞散法營私，風裁大著。十一年，掌四川、河南等道御史，幫辦五城團防事。歷署京畿、廣西兩道御史，刑、禮兩科給事中。

同治二年，授浙江湖州府知府。時府治甫克復，荒墟白骨，闕無人煙。榮緒安集流亡，閭閻漸復。乃置善後局，規畫庶政，各屬糧冊無存，榮緒招徠墾闢，試辦開徵，數年銀漕，加於疇昔。湖蠶利甲天下，亂後桑株盡伐，榮緒課民復種，貧者給以桑苗，莠然成林，絲業復盛。府故濱湖，匯天目諸山之水，舊設三十六澳，以資宣洩。榮緒以經亂多淤，設法疏濬，又淘汰城河、北塘河、碧浪湖，並立歲修章程，著爲令。復府城育嬰堂，令南潯、長興、荻港皆次第創設。又飭各屬立留嬰公所，全活者萬餘人。重葺學校，建考棚，舉賓興，修書院，積倉穀，造橋梁，編保甲，諸事井井。初蒞任時，歸安閔漕，縣令奔府署，

榮緒親往勸諭，糧戶見知府至，皆拈香跪迎，事竟帖然。遇鞠獄，堅坐詳問，吏胥立侍相更代，而榮緒無倦容。放告坐堂皇，告者人無阻，訟牒有虛謬語，則指示之曰：「汝倩人爲耶？如此使汝訟，不得休，徒爲吏役利耳。曷持歸細思？」訟者如其言，往往不復至。其受理者，卽手書牘尾，恆數百言，剖析曲直，觀者咸服之。由是訟愈稀，或兼旬無一至者。刑具朽敝，隸役坐府門，賣瓜果自活。

素性廉儉，爲郡守如布衣時。客坐無供張，每出門，僕人皆步從。年終，輒無以卒歲。上官知其匱乏，稍稍助之。布政使蔣益澧欲師禮之，遇屬吏尤謙厚，所上公牘，疵繆者教之使改，莫不感服。十年，舉卓異。嗣爲人所譖，遂求去，格於例，不得請。迺捐陞道員，解任。尋卒。人祀名宦祠。著有十三經音義考、左傳博引、讀律提綱諸書。

陳建侯

陳建侯，福建閩縣人。咸豐五年舉人，援例籤分戶部主事。十年，乞假回籍，行至河南，巡撫嚴樹森奏留襄辦營務。時捻逆勾結會匪，合犯開封。官軍由老君塘進剿，殲賊頗多。附省郡縣，一律肅清。敘功，獎直隸州知州。

同治元年，隨河南巡撫鄭元善督師杞縣，防兵四出。賊驟至，合圍環攻，城垂陷，建侯率死士百人，夜鎚垣突圍，乞師於科爾沁親王僧格林沁，連戰皆捷。圍解，力辭保獎。旋以前在籍練勇守城勞，晉知府。十月，湖廣總督官文、湖北巡撫嚴樹森奏稱建侯辦理營務，著有成效，請以知府發湖北差委。

詔如所請。二年，官文奏稱：「建侯行軍多所建白，深中機宜，尤於民生疾苦、地方利弊，纖悉周知。篤實光明，有爲有守。請留湖北補用。」允之。六年，署安陸府知府，會捻匪由東路回竄，建侯請調水師巡岳口，陸師扼白口，防賊渡潛江而南，而自率勇丁城守。賊知有備，別竄。以力保危城，加鹽運使銜。襄水驟發，民坑潰，鍾祥隄穿漏，建侯督民夫搶護，屹立隄上，水及其韉，誓死不去。隄賴以完。乃分遣吏役，乘小舟，攜糧食，救災黎。役有乘危索民錢者，立擒斬之，終事肅然。

旋調署漢陽府，湖廣總督李瀚章保薦人才，奏稱：「建侯潔己愛民，循聲卓著，於中外交涉事，尤能悉心講求，經權互用，請予簡擢。」十年三月，奉旨俟補缺後，以道員陞用。七月，署德安府知府，十一年，實授。府屬之應山有劫盜未獲，大吏切責，令懼，聽捕役誣指他竊三人成讞。獄具，援新章解府，請正法。建侯研訊得實，平反之。光緒三年，保薦卓異。六年，調補武昌府，因晉捐出力保，俟陞道員後，加二品銜。母憂服闋，以道員仍留湖北。十二年，署荆宜施道，設因利局以贍貧民。十三年，河決鄭州，河南巡撫倪文蔚奏調赴工差委，從之。建侯聞命，迂道清淮，察勘下游形勢，以勞致疾，至商丘卒。建侯敦尚志節，能勝艱鉅。其佐戎幕也，熟習輿地，夙究心兵家諸書，山川險易，賊蹤出沒，無不周知。軍書旁午，中草檄恆數千言，動中機要。其爲政，以清積案、懲健訟、安良善爲先，以察屬吏、興文教、培元氣爲本。少隨其祖官南河久，故練習河事。既，經文蔚調工，以黃河全溜入淮，欲諮訪故老，博求方略，跋涉風雪中，精考變通盡利之法，每遺文蔚書，常連數十紙。內竭思慮，外中積寒。歿後，倪文蔚爲請敕部優卹，並將事蹟宣付史館立傳。尋賜卹如例。

鐵珊

鐵珊，姓徐氏，漢軍正白旗人。咸豐初，以筆帖式考充國史館校對官。五年，補理藩院筆帖式。本紀書成，議敘知縣。十年，統兵大臣勝保調赴軍營。十一年，以直隸山東防剿出力，賞戴藍翎。濮范一帶擒首劉占考等恃衆負隅，勢張甚，奉檄諭降者多被害。鐵珊躬冒矢石抵其巢，力陳順逆，占考等降，解其黨數萬。敘功，以直隸州知州選用，並賞換花翎。旋仍回國史館供職。

同治三年，揀發甘肅，以實錄黃綾本告成，賞加知府銜。四年，署通渭縣知縣。邑當孔道，回氛四塞，期月被圍者九。鐵珊登陴守禦，城卒以完。時軍需浩穰，日供糧萬斤，民大困。鐵珊規畫減其半。及去任，父老攀轅不令行，乃單騎夜從間道去。五年，代理平番縣事。六年，署皋蘭縣。所至輕賦役，輯流亡，除蠹胥，修城堡，以次畢舉。經陝甘總督楊昌濬保以知府，仍留甘肅補用。穆圖善奏請破格錄用，均報可。未幾，丁父憂，復經穆圖善奏留，攝中衛縣事，督辦南路糧臺。九年二月，服闋。時左宗棠奉命西征，大軍雲集，鐵珊運籌飛輓，經畫裕如。十一年，補寧夏府知府，未蒞任，調蘭州府，創津貼法，民德之。舊制，甘肅鄉試併於陝西舉行，士子遠涉爲艱。鐵珊議建貢院於蘭州，條析分闈事宜上之，左宗棠據以入告。得旨，下所司議行。

光緒元年，署甘涼道，所轄武威、永昌、鎮番、三邑毘連，中有一渠，資以灌溉。民爭水械鬪，或傷或死，不可究詰。鐵珊爲開支渠，別子母水，設牓其中，立均水約，輪日灌溉，並勒碑紀其事。民大悅，爲

立生祠渠上。鐵珊又傭工牧羊，三千取息，給窮民之無告者。府經歷受其成，著爲例。六年，敍籌餉功，加按察使銜。八年，俸滿，命以道員選用。

十二年，授河南河陝汝道，問民疾苦，擒巨盜李改、李復岐等，置諸法。陝州文教陵夷，鐵珊建書院，定課程，士氣以振。閩鄉北濱黃河，南臨澗水。鐵珊擬築石壩以殺水勢，而運費無所出，忽水發閩底鎮，激湍中得巨石無數，因以施工。十六年夏五月，大雨，河水漲，陝州南城不沒者數版，居民大恐。鐵珊乃以陝州石隄之，役與閩工同時並舉，晝監役作，夜治簿書，既歲事，十月，遂卒於官。十七年，建專祠。

金國琛

金國琛，江蘇江陰人。附貢生。咸豐五年，粵匪竄擾江西，國琛杖策謁統軍羅澤南，澤南深加器異，委以營務。每出戰，部伍嚴整，雖倉猝犯之，屹然不亂。軍興以來，湘勇創自曾國藩，統之者羅澤南、李續賓、李續宜，而國琛襄贊其間，爲羣帥所倚任。是年，隨羅澤南克復江西之弋陽、廣信，保以縣丞選用。嗣克義寧州，賞戴藍翎。六年，隨克湖北武昌、黃州、興國、大冶、瑞昌，保陞知縣。七年，李續賓接統湘軍，以國琛謀勇兼優，使總理營務。

是時，九江賊苗林啓榮與湖口縣梅家洲僞城首尾援應，國琛率師會襲湖口，克之，進復彭澤及小姑洲、泰坪關等處。援賊麇至，擊退之。論功，保同知直隸州，並賞換花翎。八年四月，隨克九江府，卽率

師入皖，攻太湖、潛山、桐城、舒城。未幾，三河變起，李續賓殉難，將士死者甚衆。國琛至黃州，與續宜招集散亡，勞徠撫慰，激厲軍心，重申紀律，閱月，軍勢復振。九年夏，劇賊石達開攻湖南寶慶，水陸諸軍赴援，與賊相持。湘軍至，布置甫定，國琛從山背襲之，各營繼進，遂毀田家渡壘卡，城圍立解。又敗賊於賀家坳，斬擒甚多，逐賊走粵西邊境。(三)由是勳名日著。奏入，奉旨以知府遇缺卽選，並賞加道銜。

陳逆玉成以安慶爲巢穴，曾國荃諸軍圍之久，勢在必救。冬間，勾結捻匪十餘萬，自廬州等處分道上犯，圍鮑超軍於小池驛，救兵皆失利。皖鄂震動。國琛素悉皖北險要地勢，繪圖于湖北巡撫胡林翼，請出賊不意，問道赴援。時歲暮大雪，國琛統十四營，自潛山疾趨天堂鎮，攀援險阻，依山而行，閱十日乃出高橫嶺、仰天庵，從萬山深處俯視賊營。賊驟見旗幟，大驚。十年正月，賊衆緣崖上撲我軍，國琛初堅持不戰，忽奮擊，大破之，生擒悍酋藍承宜。復與山外各軍夾擊，又大敗之，遂克太湖、潛山。胡林翼奏稱：「非鮑軍之堅忍，不能久持，非國琛出奇致勝之師，亦不能轉危爲安。請免選知府，以道員用。」從之。

時匪攻杭州急，國琛上書胡林翼，略言：「浙省被圍，勢甚岌岌，吳越爲東南全局關鍵，非擣虛不能制勝，非出奇不能圖功。夫逆黨兇悍者，不過此數，彼注意於浙、池、太、蕪、湖一帶，勢必空虛。若分一枝勁旅，取道南岸，輔以水師，循江直擣，則各路之守賊，金陵之老巢，未有不震而驚者，竄浙之賊勢必回顧。此擣虛之兵也。由華陽鎮至京口，水程不及千里，由京口至錢塘六百餘里。若再分一枝勁旅，載

以民船，多帶行糧、軍火，而以水師護之，江流奔駛，乘風利不泊之勢，不出四五日可達京口。由京口改乘小舟，不過七日夜可達錢塘。水陸並進，較之僅由陸路馳援，遲速有間。且兵出浙之上游，蘇、松、嘉、湖可以保全。此出奇之兵也。果若是，風行雷厲，大軍自天上飛來，賊之氣餒已先爲我奪。將皖中竄賊有畏首畏尾之虞，金陵渠魁有人穴傾巢之患。庶江浙可以挽回，而大局不致危墜。不然，江浙事壞，而賊勢益張，將挾其全力以分擾南北，其禍患不僅爲東南憂，且爲天下憂。豈獨大江南北處處宜防，鄂之藩籬節節宜固哉？或曰：征皖之師，數僅四萬有奇，合則厚而分則單，若分兩枝以救江浙，則力有不逮。似也。獨不思賊有巨股以竄江浙，皖北之賊數月內必以堅守爲得計。我師進薄堅城，將有頓兵之勢，迨至江浙糜爛，由是而江右、而閩、而粵，四出蹂躪，補救爲難。將有不堪設想者，無論征皖之師未必能遽下堅城，卽懷、桐、舒、廬漸次恢復，而得殘破之皖北，與失完善之江浙，其輕重不待智者而知，況海運所關，財賦所出，爲天下安危轉移之機，而顧可不先其所急耶？」胡林翼深韙其言，部署諸將已定，旋中止。

十一年二月，逆匪由皖入鄂，連陷郡縣，國琛以官軍自下進剿，賊必直趨武漢，因建議請以大軍渡江，爲迎頭截擊之舉，遂以弋船載勇七千人南渡，逕趨武昌。既抵省城，復北渡擊賊於滸口、楊店，獲勝，進攻孝感，賊守禦甚固。國琛乘夜督水陸夾擊，克之，再擊德安，賊負嵎死守，國琛添築礮臺，開挖地道，久不能下。七月，分軍擇要設伏誘賊出城，截其歸路，我軍奮擊，遂復其城。追至隨州，擒斬幾及萬人。先後以克復孝感功，加按察使銜，以克復德安功，交軍機處記名簡放，並加布政使銜。九月，補授

湖北安襄鄖荆道，仍兼統勇營。襄樊爲鄂省門戶，髮捻時來窺伺，國琛於樊城建立土城，以資防守。嗣因捻匪西竄秦中，上以陝西軍務亟須得人整頓，以保關陝重地，陝月中七奉諭旨，敕國琛帶兵赴陝，經湖北，督撫以賊竄鄖西，防務喫緊，奏留。

同治元年七月，髮逆馬融和由鄖糾衆五六萬圍攻南陽，國琛率十二營星夜前進，賊知援軍將至，上施雲梯，下挖地道，以圖必克。郡城內外，消息不通，國琛分兩路進軍，以馬隊直擣中堅，鏖戰三時，賊始敗退。越日，乘勝追剿，賊衆大奔。圍遂解，南陽官民莫不感泣。官文奏稱：「宛郡爲南北關鍵，設有疏虞，不特秦豫有肘腋之憂，楚邊亦無安枕之日。南北隔絕，大局不堪設想。國琛此役，厥功甚偉。」得旨優敘。旋因鄂撫嚴樹森劾國琛赴調遲延，遂以同知降補。後張之萬奏調赴豫，毛鴻賓奏調赴粵，皆以傷病舉發辭，遂請假赴湘調養。

二年秋，曾國藩奏調赴皖接統義從等營，防剿皖南。髮逆賊由浙江入皖，延擾徽郡，國琛截擊於豹嶺、佛嶺、黃備口，復要截於小溪，剿除殆盡。以功開復原官。十月，補授甘肅鞏秦階道。四年，皖南撤防，國琛因母老請開缺終養，雲貴總督劉嶽昭奏調赴滇，以母病力辭。八年，丁母憂。九年冬，湖南巡撫劉崐奏調赴湘，嗣因籌餉出力，部議復還布政使銜。光緒元年，補授廣東督糧道，督辦釐務，剔除弊端，勾稽精密。三年，署廣東按察使，四年，奉旨補授。國琛於署內設立積案局，勘覈州縣詞訟，有賭案盜犯，皆親往密拏。五年四月，辦理秋審，悉心勘覈。事竣，將遵旨陛見，六月，因勞傷復發，卒，年五十有八。兩廣總督劉坤一奏聞，奉旨賜卹如例。

國琛居家孝友，任卹鄉閭，嘗創建西郊書院及試館，開潘江陰之丁、桃、利三大支河，以興水利，鄉人至今利賴之。

鍾謙鈞

鍾謙鈞，湖南巴陵人。道光二十四年，報捐從九品，分發湖北。旋丁父憂，服闋，仍赴湖北候補。咸豐元年，署沔陽州鍋底司巡檢。五年，以團練功，陞用府經歷，縣丞。六年，籌辦軍需，擢知縣。七年，丁母憂，湖北巡撫胡林翼奏留，辦理膏井鹽茶事宜。八年，湖廣總督官文以「謙鈞潔己奉公，民情服悅」保奏。得旨，以同知直隸州補用。九年，檄辦牙帖、釐金、鹽釐等務，勞動最著。經胡林翼奏獎補缺後，以知府用，先換頂戴。十一年，隨官文等克復黃州府城，命免補本班，以知府補用，並賞戴花翎。

同治元年，補漢陽府知府。漢陽舊有晴川書院，燹於兵，謙鈞增齋舍，捐田以助膏火，並籌貲生息，爲經久計。漢沔頻遭水患，災民流徙，輒十數萬。謙鈞於大別山麓設廠，散給糜粥，加意撫恤，寒暑靡間，流民無一失所者。時漢陽攔江大隄潰，以工代賑，全活無算。漢口商市所幸，向無城郭，爲羣盜所瞰。謙鈞倡修堡垣，集貲十餘萬，逾兩歲工成，崇墉綿亙十餘里。賊由黃麻來犯，不得入，市廛賴以安堵。復倡修育嬰、敬節兩堂，嚴立條規，保全甚衆。參將成大吉統軍駐漢口，因索餉未得，幾至譁變。謙鈞單騎至軍，曉以忠義，軍心翕服，無敢於境內滋事者。二年，官文以「謙鈞廉正勤明，總理湖北糧臺，接濟鄰省諸軍月餉，綜覈精密，任勞任怨，洵屬才能出衆之員」，疏請獎勵，得旨，賞鹽運使銜。四

年，調武昌府知府，舉卓異。尋署漢黃德道。八年，擢廣東鹽運使。廣東濱臨大海，六門內外，私鹽出沒靡常。謙鈞巡緝嚴密，梟匪斂迹。省城粵華書院向有運司衙門，支給膏火銀兩，謙鈞覈實發給，不假吏胥之手，復捐菊坡精舍經費，肄業者均沾實惠。九年，敘前在湖北籌辦陝西捐餉，加按察使銜。十一年，署按察使以捐直隸賑，加二品頂戴。

謙鈞歷任所至，務飭風化，民有以細故爭訟者，每婉轉勸諭，發其天良，兩造往往感泣，不終訟而去。暨署臬司，尤留意京控發審案件，日必親臨讞局，悉心研鞫，判結最多，案無留牘。創建候審公所，爲待質人證棲止處，籌備資糧，調其衣食，鮮有疲斃者。南海、番禺兩首邑，每多羈囚，謙鈞令立積案局，酌定章程，派員推鞫，用能剖決平反，悉成信讞。積牘爲之一清。十二年，因病乞休，十三年，卒。

俞澍

俞澍，直隸天津人。監生，以從九品分發安徽。咸豐五年，助剿粵匪，兼管理糧臺。有功，保縣丞。六年，捻匪滋擾懷遠、宿州，壽春鎮總兵鄭魁士檄澍隨營襄治軍事，獎補缺後以知縣陞用。旋署蒙城縣知縣，適捻匪竄渡沙河，攻蒙城。澍集團兵，晝夜防守，捕斬內應三人。賊圍攻不克，遂遁去。敘勞，擢知州，並賞戴藍翎。七年，賊踞鄆墟，澍又率團勇攻之，擒酋目徒成德等，進逼賊巢，俘獲無算。八年，攻龍元賊壘，遏其分竄之路，乘勝圍剿，連克十餘處。捻首孫葵心乘隙犯蒙城，澍出奇兵擊走之。圍解，加知府銜，並換花翎。九年，實授蒙城縣，澍以歷次防剿績，保陞同知直隸州。十月，卒。奉旨照知

府例議卹。同治三年，安徽巡撫喬松年疏言：「澍潔己愛民，勤勞備至，衆心感戴，追念不忘。」詔追贈道銜，於蒙城縣建立專祠。

婁詩漢

婁詩漢，浙江山陰人。道光二十二年，以從九品分發江蘇，署沛縣典史。迴避，改發陝西，補褒城縣巡檢。丁母憂服闋，陞縣丞，分發直隸北河。六年，署涿州州判。同治四年，署景州州判。詩漢久任河職，究心水利，督治隄埝，皆有法度。懲吏役爲奸利者，民爭赴功，田漕交利。六年，畿輔大饑，委辦天津粥廠，別男女，分老幼，以旗鼓進退之。凡五閱月，就食者日萬計。終事無雜亂濫冒之患。論功，爲諸廠最。

七年，擒匪北竄，天津戒嚴。吳橋奸民以八卦會惑衆，鎮道慮其爲擒內應，議戡以兵。時詩漢與巡防之役，懼其株累也，自請微服往按，奔馳兩晝夜，抵其境，掩捕渠魁數人，餘衆解散，不數日而事定。先後以海運及防擒功，保陞知縣，並補用同知。十年，署永年縣，視事百日，清滯獄三百餘，票傳人證，務從核省。至則堂審略無積留，因事開誠勸導，訟者往往悔悟自咎，或至感泣。縣豪高姓謀奪寡婦某產，訐以奸，詩漢察其誣，治豪如反坐律。光緒二年，權成安縣。四年，署安平縣。

詩漢爲政，以通民隱爲首務。所至必召請紳耆，詢民間疾苦利便，汲汲如痛癢在己。時以事詣鄉，輕騎裹糧，不受民間餽獻，婦孺聞其至，亦歡呼迎拜，如家人父子焉。嘗製勸善俚歌，刊布鄉里。刁猾

募民，必先以情理曉譬，如怙惡不悛，則於廣衆加之罰。百姓咸畏而愛之。境內被水，前令以災輕報。詩漢甫下車，卽棹小舟，躬赴四鄉巡視，被災凡百餘村，田廬蓄聚，半淪巨浸，惻然閱之。力請上游，得陳准緩徵。復達書江南善士，籌及鉅款，運糧及綿衣以賑，並分飭紳董，廣開粥廠，架席爲棚，以棲宿尤貧者。徵收既停，官無所潤，而辦賑費又不貲，或勒索錢大户，藉以集事，詩漢堅不肯，而自賃錢數十萬繼之。兼籌以工代賑法，募民濬溝洫，創翻水車，以消積潦。壯者得雇值自活，而水患亦除。恆往來災區，冰天雪窖中，匹馬馳驅，未嘗少逸。有以節勞勸，則曰：「吾民方在水火，爲之父母者，忍卽安乎？」故安平雖遭鉅災，而人無凍餓死者。以積勞致病，在任踰四月而卒。部民聞喪，如失慈母，相率入城哭奠。歸葬之日，爭爲更迭舁柩者以千數，士民稟懇奏請優卹，旋贈知府銜。

段起

段起，湖南清泉人。由監生捐輸軍餉，獎道員。弱冠，卽爲廣西左江道王普相記室，數陳兵事，動中機宜。普相薦諸巡撫勞崇光，俾部百人，首解全州圍。別賊鄧正高等思乘虛襲永州，進窺衡州。起先後單騎馳諭，降其衆。貴州苗亂，擾及廣西之懷遠縣境，起奉檄討清江、高峯二苗，平之。

廣西事定，崇光檄令赴援江西，謁曾國藩於行營，國藩初不納。時建昌有賊三萬，久不克，起率所部四百人，夜撲其壘，一鼓下之，乘勝復德安。國藩乃收爲護衛軍，易軍名爲衡字營。咸豐七年，從劉騰鴻、李續宜、普承堯攻瑞州、騰鴻戰死，起亦被重創，卒克瑞州。吳楚釁道始通。八年，援浙，解衢州。

圍，賞戴花翎。復還攻景德鎮、浮梁縣，克之。九年，逆首陳玉成由皖南竄江西景德鎮，起力扼其衝，賊以數萬死爭，裨將樊俊沒於陣，起裹創衝突，賊竟不得南竄。浙撫王有齡請援，起輸家財募勇，遣別將率以行。江寧賊之繞侵浙西者，以次就殲。有齡奏調起赴浙，總領水陸全軍，而江西亦倚起爲重。巡撫毓科以起復景德鎮、浮梁縣城功，請加鹽運使銜，交部優敘，並以道員留江西補用，允之。十一年，李秀成逆衆飢疲，思就食廣豐，遂圍其城，并分兵圍廣信。起星夜赴防，嬰城固守，賊不得逞。偵其將遁，開壁馳擊，賊大潰，並解廣豐圍而去。民間倉穀，手自封題，故賊退而民食無匱。以先後捐貲募勇，敕部按數核給獎敘。又以玉山兩次解圍，及追擊廣豐、廣信竄匪，加布政使銜。十月，敗匪復竄廣豐，起督師擊敗之，下部優敘。

時起駐防廣豐，十二月，兩江總督曾國藩疏請將所部各軍均歸左宗棠就近節制調度。同治元年，江西巡撫毓科奏起約束堅明，輿情愛戴，奉旨交軍機處存記。九月，授江西督糧道。二年，收復鄱陽、彭澤各縣，賞給瑚松額巴圖魯名號。九月，巡撫沈葆楨奏請將候選道屈蟠所部營勇，歸起兼統。三年，飭赴本任，起慮賊平，凱撤兵勇難以安置，條陳事宜獻之。葆楨據以入奏，諭令各直省妥議近年武職借補及收標考課各章程，率本起議。金陵初平，餘匪分竄江西，起薦精毅營將席寶田添軍兜剿，擒僞小天王洪福瑱。四年，霆軍駐江西，索饒譁噪，起疾馳曉諭，前隊不識，伏矛直刺洞頤及股，既有識者，大呼曰：「糧道也！」皆棄兵羅拜，起反覆開譬，變遂定。尋兼署江西按察使。先是，江西、閩浙之交，有山蜿蜒千里，夙爲盜藪，久封禁。賊熾時，居民避亂，多匿其間，生息日繁。至是，有指爲江南餘寇者，廷旨

救三省會剿。起疑之，輕騎馳其地，周歷詢訪，盡得其避亂匿居狀，遂據情上請，奏懇弛禁。民感再造惠，爲建生祠。護署巡撫孫長絨奏起沉毅有謀，賞給一品封典。六年，以疾歸，出祿俸所餘，贍宗族，立義莊，別設育嬰、補卹二堂，賑孤寡，周乏絕。九年，邑大饑，計口授食，全活逾萬家。十三年，沈葆楨奏調赴江南差遣。光緒二年，復授江西督糧道。三年，調補江蘇徐州道。徐屬推埋攻剽，自漢爲然。起躬行保甲，興學校，民風丕變。徽山、昭陽兩湖涸出墾田，貧民墾闢成熟，黠者輒爭奪之，獄訟不休。起躬親履勘，爲剖別，人服其平。

六年，兩廣總督張樹聲奏調廣東差委，始至，屬夷警，方急籌防備邊，靡役不從。十月，授廣東鹽運使，卻苴餽，禁姦私，期年課入增倍。八年，卒。張樹聲奏請於立功地方，建立專祠。

姚國慶

姚國慶，廣東番禺人。監生，以同知銜知縣，分發河南試用。咸豐七年，隨營剿賊，克復方家集、三河尖賊巢，歸候補班補用。是年，因防河，賞戴藍翎。十年，擒匪竄踞河南之黃園，國慶隨官軍追剿，殲俘略盡，豫省肅清。換戴花翎。十一年八月，皖捻西竄，國慶隨官軍截擊於鄭州，立解城圍，又擊殄山東會匪之攻撲鄭州者，保以直隸州用。同治元年正月，丁母憂，河南巡撫鄭元善奏請留營差遣。旋隨汝寧官軍攻克陳逆老巢，並擒獲逆首之弟，保俟服闋後，以直隸州歸候補班補用。四年，署陝州知州。時徵兵過境，往來如織，國慶威鎮理諭，居民安堵無驚。八年，署光州知州，旋以代去。

十一年三月，補光州，因攻克賊巢，以知府用。光緒三四年間，晉豫奇災，道殣相望。國慶捐廉賑濟，全活無算。光故夾潢水爲城，疊石成岸，歲久水嚙石頽。國慶召紳耆籌巨款興修，躬自督勘，工以速成。七年七月，息縣奸民徐中義糾合潁、亳、太和匪徒，約期舉事。國慶偵知，密約防軍掩捕，中義見事急，不待期而踞寨豎旗，恣爲劫殺。國慶乘賊衆未集，督勇進薄其寨，中義倉皇遁，餘衆奔潰，乃懸賞購首惡，越七日，中義伏誅。州境以安。巡撫徐宗瀛保以道員用。光州自遭兵燹，士女多以身殉。國慶設局採訪，著忠節志六卷，復勸積穀以備荒歉，增號舍以惠士林，輿論翕然。八年十月，以積勞卒於官。

沈錫華

沈錫華，浙江海鹽人。咸豐七年，以巡檢分發江蘇，初任吳縣光福巡檢，後署吳縣典史及縣丞，代攝吳縣、吳江知縣。兩江總督曾國藩、江蘇巡撫李鴻章以守潔才優，習勤耐苦保奏，遂授吳江知縣。尋因承緝盜案鑄級。時江蘇巡撫丁日昌以錫華勤苦耐煩，奏請開復，疏再上，允之。再任吳江，調常熟，以勞疾乞歸。

其任光福巡檢也，革除規費，約束吏役，徒步巡行村落，勸息爭端，懲治土棍。居官如家，頌聲四起。其署吳縣典史、縣丞也，時省垣巡防，募漕艘水手爲團勇，強橫多不法。知府遣員掩捕，輒被毆辱。錫華立執拒捕者置之法，全部肅然。咸豐九年，震澤鄉民抗糧，聚衆萬餘，環伺城外，銜接十數里，臨以